

CAROLI MARIE ROSINII

COMEDIA

THESAURUS



12

CAROLI MARIE ROSINII

EPISCOPI PUTEOLANI

THESAURUS

COMEDIA

E MANUSCRIPTIS ERUTA
MENDIS PURGATA METRICIS

PER SALVATOREM PISANUM-VERDINUM

REGIÆ ACADEMIÆ
ARCHÆOLOGICÆ LITTERARUM ET PULCHRARUM ARTIUM SOCIÆ ORDINARIUM
S. THEOLOGICÆ ET PHILOSOPHIÆ DOCTOREM
ETC. ETC.

NEAPOLI
TYPIS FIBRENIANIS
MDCCCLXXI

PERSONÆ

TROPHONIUS PUTEOLANUS.
GETA TROPHONII SERVUS.
CLAUDIUS PROCHYTENSIS.
POLLIO CLAUDII COMES.
LUCIPOR CLAUDII SERVUS.
MENEDEMUS.
PRAEFECTUS VIGILUM.

PROLOGUS

Ut res bene vortant, spectatores optumi,
Vobis, atque gregi, qui placere nititur,
Precor ego Prologus, et argumentum innuam.
A patre Ægypti commorante litteras
Accepit ægyptiace scriptas Claudius
Natus, et una bis mille nummos aureos:
Legendi ignarus Puteolis Trophonium
(Excultum litteris quidem, at vaferrimum)
Convenit, et parentis litteras dedit
Legendas, nummosque acceptos monstrat bonus.
Pecuniarum ille appetens commentus est
Thesauri ingentis indicium fieri a patre;
Quem ut effodiat, missas ait pecunias.
Rogatus ut consilio adjutaret suo;
Servi tunc opera, qui modo *Mercurius loquens*,
Modo *Serapis rapiens* factus, sibi vindicat
Aurum, sed alexandrinam mummiā effodit
Illi: in flagranti at deprehenso crimine,
Pompa per urbem deducti, risum cient.
Ridicula res est, date benigni operam gregi.

* Scripsit Salvator Pisanus-Verdinus.

THESAURUS^{*}

ACTUS PRIMI

SCENA PRIMA

TROPHONIUS et GETA.

Domus in atrio.

Troph. Ab Jove ¹⁾ suam quemque auspicari operam, ac diem
Decet: aliter qui faxit, quique uni sibi,
Suisque plus justo confusus viribus,
Inconsultis Diis, adgreditur omnia;
Huic perraro est, ut sua ex sententia,
Feliciterque olim quidquam successerit.
Porro suum cuique, prout mortalium
Alia aliorum sunt studia, esse Jovem reor.
Mercurius mihi meus est, eritque Jupiter:
Huic addidi porro Lavernam conjugem.
Neque id temere nunc a me confietum arbitror:
Si licuit Junonem uxorem Jovi dare,
Queniam dissidia, rixaeque usque, et jurgia
Sient, idque omnis bona credidit antiquitas;
Quidni queam uxorem Mercurio adjungere
Lavernam, quorum utriusque mirifico modo
Eodem conspirant studia, et consentiunt
Artes? Adeste igitur Laverna, et Mercuri.

^{*} Hunc anno 1897. scripsit clarissimus Rhetorices Seminarii Patetolani antecessor Vincentius Rinaldus: annis autem insequentibus Rosinius, effusa pro thesauro Mammis Alexandrina, magis credibilem, ac ridiculam praestitit.

¹⁾ Solus, et fere orans.

- Adeste propitii mihi usque, et benevoli,
O Numinum omnium par praesentissimum.
- Get.* Herum, Mecastor ¹⁾), nactus sum mortalium,
Quot quot sunt uspiam, religiosissimum.
Vix illuxit, vide, ut, conversis ad Deos
Oculis, enixe rogitat. Dispeream illico,
Ni quam pro more sibi roget fallaciam.
- Troph.* Ego vero ²⁾) prima inde usque ab adolescentia
Me totum vobis, et vestrae fiduciae
Devovi, et tradidi, vestrasque sedulo
Artes addidici, nec celebrandis laudibus
Unquam peperi vestris: vestra plurimo
Et igne, et thure apud me noctu, interdum
Renidet ara. Adeste ergo, atque hunc mihi diem
Laetum facite, frugisque uberrimum bonae.
- Get.* Adibo ³⁾), atque interpellabo, ne serius
Post me venisse accuset, et nates dolet.
- Troph.* Salve, here mi, salute longa, et plurima.
Id horae? Adspice, quantum viae jam fecerit
Sol, et tu nunc demum appares mihi, furcifer?
Quid, lautius si coenatum, atque largius
Potum dimiserim? Pol! dormires adhuc?
- Get.* Ego vero jamdiu heic aderam prope ostium;
Sed expectabam, donec obtundere caput
Dis cessares. *Troph.* Quid est hoc obtundere caput ⁴⁾)?
- Get.* Dicere volebam ⁵⁾), quod mi paulo longior
In orando videris, eandem naeniam
Quasi surdis occentares. *Troph.* Ita ne furcifer ⁶⁾)?
Ast saepe peregre animo Di sunt, hoc saepius
Inculcandae preces, et ad fastidium
Iterandae, expugnet saltem ut importunitas.
- Get.* Humanos nae ⁷⁾) tu mihi narras hodie Deos,
Qui juxta ac homines non sese sinunt, nisi

¹⁾ Videt orantem, et secum ait.

³⁾ Humili voce iram cohibet.

²⁾ Non videns Getam prosequitur.

⁴⁾ Ut supra.

⁵⁾ Partim secum, partim cum Trophonio.

⁷⁾ Retundit argumentum Trophonii.

⁶⁾ Subritus inquit.

Molestia, et procacia exorariet.

Troph. Nullos equidem, nisi Humanos volo Deos ¹⁾,
Qui norint nobis humaniter ignoscere.

Get. Aliorsum torques verba: verum theologum est
Loqui de Dīs. Ad rem tu, quae tua interest,
Et mea quam maxime, mentem vortas, precor.

Troph. Quam narras rem? *Get.* Laetissimam mercurule ²⁾,
Bonique, opinor, ominis: nil laetius,
Ex quo materna alvus te projecit foras,
Tibi auditum autumo unquam. *Troph.* Quam tandem ³⁾? age
Effare. *Get.* Somnium, sed quale, Dii boni!
Quantumque somnium! *Troph.* Tun' mihi ⁴⁾, tun' verbero,
Das verba? Aegre me tenco, quin in fustem involeni;
Tuisque tempestivius jentaculum
Lumbis repraesentem ex plagis et verbere.

Get. Quam pronus, here mi ⁵⁾, ruis in iracundiam!
Ausculda sis modo patientius rogo.
Mera quae sunt aliis somnia, haec haud somnia
Sunt mera tibi, qui, quae tua est sagacitas,
Soles Deum mentem expiscari ex somniis:
Quod si servile somnium hoc uno facis
Nihili, servile quod sit; ori pessulum
Obdam, nec ullum posthac verbum addam amplius:
Tu vero laetandi non improbabilem
Occasionem forsitan praetermiseris.

Troph. Vide, ut me ad audiendum accendi hic vafer.
Age audiamus, quae tibi benignior
Bacchus stertenti immiserit deliria.

Get. Non procul aurora aberat, cum visus es mihi
Tu, factus illico piscator jam prope
Lucrinum litus (et tecum ipse aderam simul)
Retia in aquas jacere, eademque postea
Traxisse multis pene rupta piscibus.

¹⁾ Graviter Trophonius.

²⁾ Hilaris, ac festivus Getas.

³⁾ Impatiens morae sit.

⁴⁾ Ut supra subintratus.

⁵⁾ Mollī sermone iram cohibet, deinde susdet, ut somnio det fidem.

- Troph.* Nae tu non ambiguum narrasti somnium:
Sed vereor, ne pro somnio fallaciam
Propines mihi docte confietam ex tempore.
- Get.* Male tergo, male natibus, si fallo, sit meis.
- Troph.* Quorsum evadat, priusquam Phoebus occidat,
Videbimus. Nunc hinc ad Thermopolium,
Si qui fortassis illuc Thynnus adnatet,
Adibo, ut expiscer. *Get.* Di mentem animi bonam
Juvent, et quidquid moliris, vortant bene.
- Troph.* Interea tu curata fac sint omnia
Bene, et expolita: pulverem de vestibus
Excute, verre domum, singula ordine suo
Quaque loco: parva si snpellex contigit,
Sit munda saltem: prandium dein appara.
- Get.* Quod prandium *)? ah, ah! pisces illos scilicet,
Quos noctu expiscati sumus per somnium?
- Troph.* Quid ais procax? *Get.* Aio, quod apparem, domi
Prorsum esse nihil, non adipem, non legumina,
Non oleum: exhaustum, et vacuum penus aranea
Diu obsidet. *Troph.* Sumi in foro, si absunt domo.
- Get.* Sed venduntur, non dono dantur enilibet.
- Troph.* Ohe, ne sis molestus, tute videris:
His obde pessulum foribus. *Get.* Factum puta.
- Troph.* Huc neminem admittas; si quis forsân velit
Me, illinc accessas protinus *). *Get.* Teneo satis.

SCENA SECUNDA

GETA.

- Get.* Probe *)! quam facilem herum mihi sors obtulit!
Difficile nil est, quod non sibi facillimum
Videatur. Namque verbo nummos comparat,

*) Irridens ait.

*) Festivus et hilaris.

*) Egredietur domo.

Verbo resolvit nodos, verbo prandia
 Instruit, et coenas. Quid faciam? promptum ad manus
 Consilium est scilicet: verbosum prandium
 Verboso fas est homini concinnari:
 Verba assa, verba fricta, vel appararier
 Elixæ. Sed multam ego fidem habeo somnio,
 Gestitque meus, nescio quid, animus. Interim,
 Ne verba fiant verbera, purgemus domum.

SCENA TERTIA

LUCIPOR et GETA.

Domi

- Lucip.* Heus, heus ¹⁾, o quisquis versaris domi, fores
 Reclude. Nemon' audit? rursum fortius
 Pultabo januam. Heus, heus? *Get.* Quis pultat fores?
- Lucip.* Aperi, tum videris, qui sim. *Get.* Vide, ut sera
 Mordicus adhaesit: aliquid, puto, rubiginis
 Obduxit ferrum. *Luc.* Inunge oleo, aut counitere
 Fortius. *Get.* En patuit. *Luc.* Salve. *Get.* Salvus tu quoque
 Sies. Quid quaeris, vel quem? *Luc.* Quemdam nomine
 Trophonium quaero. Habetne heic? *Get.* Habet, at nunc domi
 Non est. *Luc.* Scin', quo abierit? *Get.* Ad Thermopolium
 Iturum recta hinc modo se dixit, cum exiit.
- Lucip.* I, si breve est iter, atque illum arcessas, precor,
 Nec parvum feceris, scias pretium viae.
- Get.* Sed quid opus est quaesito? *Luc.* De re herus meus
 Gravissima illum convenire, et colloqui
 Volt una quamprimum. *Get.* Sed quod, sodes, tibi
 Nomen? *Luc.* Lucipor. *Get.* Hero autem? *Luc.* Claudium vocant.
- Get.* Unde domo? *Luc.* Prochyte. *Get.* Quanto censu? *Luc.* Maxumo.
- Get.* Quid quaeso volt loqui? Nos inter servulos

¹⁾ Fores pultat.

Arcanum est nullum, ut noris. *Luc.* Id novi quidem:
 Cur autem ad vos herus veniat, id me latet:
 Id unum novi, auro gravem bene sacculum
 Huc detulisse. *Get.* Verum ais? Proh Jupiter!
Lucip. Verissimum. *Get.* Auro sacculum gravem! *Luc.* Quidem.
Get. Ludis me. *Luc.* Cur ludam? Ita me omnes Dii juvent.
Get. Adeon' nummatus est vir? *Luc.* Quid mirum tibi?
 Negotiatoribus oppleta est insula,
 Qui modis adnectuntur aureos. *Get.* Papae!
 Negotiatum forsitan huc tuus venit
 Herus? *Luc.* Id, inquam, ignoro. Vin' illum arcessere ¹⁾?
Get. Abi, atque huc post horam redito una cum hero.
Lucip. Mox adero: At tu. *Get.* Ne plura, jam factum puta.
 Aut fallor, aut pinguis jam adnavit thyngulus.

SCENA QUARTA

TROPHONIUS, MENEDEMUS, et MOX GETA.

In Thermopoli.

Troph. Salve, o Menedeme. *Mened.* Di te quoque salvum velint,
 Trophoni. *Troph.* Quidnam est, quod nullas accenderis
 Adhuc prunas? *Men.* Carbonum summa est caritas:
 Notus praeterea flat. Calidior est dies.
Troph. Intelligo: studendum est parsimoniae:
 Sic suadent tempora in pejus ruentia
 Cottidie. Solitam age nunc sis potiunculam
 Cedo. *Men.* Eccam. *Troph.* Amariusecula est; olet fabas.
Mened. Quid tibi nasi? *Troph.* Adde sis paucillum sacchari.
Mened. Eccum utere. *Troph.* At benignitate abutier
 Nolo: cochlear unum mihi sat est: nunc ebibi
 Potest: benigne. Qui rumores? qui logi
 Circumferuntur? *Men.* Nil novi novissimae

¹⁾ Impatiens morae inquit.

- Habent ephemerides: silere nos jubent.
- Troph.* Ego vero, fateor, si quid forsitan accidat
Potissimum, nosse id gestio. *Men.* Quidnam novi?
Cantilena vetus est: omaes esuriunt
Ad unum. *Troph.* Utinam falsus fores! At at Getam hue
Advorsum propere video properantem pede:
Non de nihilo est, quod veniat. Di, facite, ut bonum
Adportet nuntium. Quo te, Geta? Quid est,
Quod ex insperato huc adpares? *Get.* Nuntium?),
Quam faustum, felicem, et bonum spero fore,
Adporto. *Troph.* Quem?). Age, Geta, enarra, effunde, evome.
- Get.* Oh, ne urgeas!): sine me colligere animum prius,
Sudore et frontem perludentem abstergere.
- Troph.* Sino: nec dum abstersus sudor? nec dum spiritus
Collectus? *Get.* Sine adhuc dum; mox omnem rem scies,
- Troph.* Expectabo, donec tibi commodum siet.
- Get.* Audi, ergo, et scito. Dum purgandis aedibus
Operam navabam egomet. *Troph.* Quid factum est?). *Get.* Ordine
Sine me, quaeso, eloqui rem, ut facta est. Cumque aquae
Pauxillum in terram ad comprimendum pulverem
Adpersissem... *Troph.* Quid tum? *Get.* Quandoquidem sic jubes,
Effundam simul omnia nullo prorsum ordine:
Ut quidque in buccam venerit, sic evomam:
Tute expediveris, tute intellexeris.
- Troph.* Dum ne eneces longis illis ambagibus,
Eloqnere. *Get.* Convenire te, atque colloqui
Tecum quamprimum discupit. *Troph.* Quis? *Get.* Nempe herus.
- Troph.* Quod illi nomen? *Get.* Hem! de memoria excidit.
In ius certe desinebat, syllabae
Primae effluerunt. *Troph.* Num Antonius, an Iulius,
An Caius?... *Get.* Non, sed Claudius. *Troph.* Verum unde is est?
- Get.* A Prochyte. *Troph.* Quid me vult? *Get.* Nescio. *Troph.* Quid autumas,
Quod me conventum volt? *Get.* De re inquit maxima.
- Troph.* Quis inquit? *Get.* Ejus servus, quem praemisera

1) Hilaris, et magna cum pausa.

2) Adhuc cum pausa.

3) Impatiens morae alii.

4) Abrenuntio sermonem.

Scitatum, ut modo dixi, numquid fores domi.

Troph. Nunquam id dixisti. *Get.* Quia tempus non das mihi.

Troph. Nunc quid servo factum est? *Get.* Abiit apud herum.

Troph. Eccc abiit? *Get.* Dum te scilicet arcessem:

Post horam condixi, ut rediret is cum hero.

Troph. Nunc pol! tenere mihi video probe omnia.

At at nil subiit de domini expiscarier

Fortunis. *Get.* Imo hercle, hoc primum curae fuit

Praevortier. *Troph.* Quid extudisti? *Get.* Divitem

Quippe esse hominem: Gravem fert auro saeculum:

Nunus metitur modio. *Troph.* Papae! Sed quomodo

Id noris? *Get.* E servo sum doctus omnia.

Troph. Belle quidem habet. *Get.* Ille est quod dixeram modo

Adferre me felicem, et faustum nuntium.

Troph. Macte, o mi Geta, pro nuncio hoc valde te amo.

Praei, mundam fac inveniat hospes domum.

Mox ipse adero. *Get.* Ne dubites, honor etiam meus

Agitur ¹⁾. *Tr.* Menedeme? *Men.* Adsum. *Tr.* Nostin' Getam hunc meum

Servum? *Men.* Novi hercle. *Troph.* Si quid illum misero

Ad te, quidquid meo rogabit nomine,

Fac des. Cuncta tuis describe rationibus:

Priusquam mensis exeat, ad teruncium

Satis tibi fiet. *Men.* Apage verba istaec. *Troph.* Vale.

Adhuc ²⁾ dum heic haeres furcifer? *Get.* Verum abieram

Ego, sed mappula exciderat: regredi viam

Retrorsum, ut quaererem, coactus sum, mi herc.

Troph. Post januam quaerebas mappulam, o bone?

Get. Si forte.... *Troph.* Si forte aucupares, verbero,

Quae secreto istius auribus committerem.

Get. Minime, minime, per omnes adjuro Deos.

Troph. Nequam, perjure. Proh! Deum, atque hominum fidem ³⁾!

Get. Adesto, Menedeme, precor. *Men.* Jam nunc parce sis,

Trophoni: servile ingenium id est omnibus,

¹⁾ Abire simulat, sed cum audit ex ore domini suum nomen, sistit secreto, ut forte aucuparet, quae dicit dominus Menedemo.

²⁾ Servumprehendit subuc morantem, et acriter arguit.

³⁾ Fuste petii Getam, qui in Thermopolium fugiens Menedemopeum implorat.

Ut cuncta domini facta expiscari velint.
Troph. Effugisti, vafer: te conveniam domi.

SCENA QUINTA

CLAUDIUS et POLLIO.

In via prope Thermopolum.

Claud. Pollio, videsne, aeruscatorem examina
 Quanta obsident vias, plateas, compita?
 Vix huc alienigena pedem quis intulit,
 Cabronum more turmatim undique ingruunt,
 Stipemque efflagitant importunissime.
Poll. Id jamdiu considerabam scilicet.
Claud. Ut cuncta sensim adrodit, mutat, detexit
 Tempus! ut humanarum rerum convertitur
 Facies! Urbs haec, urbs quondam longe gentium
 Fama, cultu, atque opibus celebratissima,
 Prostrata nunc jacet! Pene omnis obruta
 Sua ipsius ruina: nec se attollere
 Ad priscam satagit gloriam, nec advenis
 Monstrare fracta vasti membra corporis
 Pudet. Languent bonae artes; omne intercidit
 Commercio, miserum victum, et pauperrimum
 Piscatu vix pauci homines quaeritant sibi;
 Quique olim, ventis contemptis, et fluctibus,
 Ad usque Nili commeabant ostia;
 Nunc Bajas, et Baulos pavent praetergredi.
Poll. Hoc ipsum enim vero, Claudii, tacitus modo
 Mirabar; nec multa animo volventi meo
 Ulla occurrebat causa satis idonea,
 Puteoli cur Puteoli non sint amplius.
 Mare, aedepol, nunc etiam, ut quondam, proximum
 Habent in Mediterranei meditullio
 Fere positum. *Claud.* Patet ad Gades via ultimas,

- Patet ad aegaeum, et ulteriora litora.
Poll. Multo, quam quondam, facta est navigatio
 Tutior, aut expeditior, cum pixis est
 Reperta nautica. *Claud.* Vicinarum gentium,
 Quae oculos incurrant, et percellant, plurima
 Sunt circumquaque exempla. Florent nautica
 Cajeta, Prochyte, Surrentum. *Poll.* Stupent tamen
 Heic mentes otio, et pigritia perditae:
 Nec potis est quispiam unus expergiscier.
Claud. Hoc nimirum illud est, quod fando saepius
 Audisse memini: ut crebro commutant aves
 Coelum suum pro frigoris, aestusve vicibus;
 Haud aliter artes quoque modo migrare huc, modo
 Illuc, nec certum habere domicilium uspiam.
 Num, quae fuere Athenae, sunt hodie quoque?
 Fuit Tyrus, fuit Carthago. *Poll.* En Lucipor.

SCENA SEXTA

LUCIPOR, CLAUDIUS, POLLIO ET MENEDEMUS.

In eadem via.

- Lucip.* Quae me iussisti, jam confeci omnia.
 Sed, ut facerem, laborandum, ecastor, mihi
 Fuit strenuae ita omnes viae obsitae luto
 Sunt, et sordibus. Augiae me stabulum ingredi
 Visum est mihi; ut posthac, si quis rogaverit,
 Quibus Puteoli abundant rebus, protinus
 Duabus ego respondeam. *Poll.* Quibus cedo?
Lucip. Coeno scilicet, et coementis. *Poll.* Vide, obsecro.
 Ne tibi sales aliquid creent negotii.
Claud. Heus, Lucipor, non curatum misi vias,
 Sed de Trophonio ut peteres: age, quid refers?
Lucip. Non longe ab arce est illi domus; ast non erat
 Domi, cum illuc perveni; servum repperi:

Quo isset, quæsi; illinc ad Thermopolium
Respondit. Cum rogassem, ut ipse arcesset,
Quod colloqui cum illo de re velles gravi,
Facile hominem exoravi; quare subdidit:
Abi, ac redito post horam huc una cum hero.
An non, quæ iussisti, executus sum probe?

Claud. Euge, puer, imperata diligentius
Qui faceret, adhuc, poll expertus sum neminem.
Hoc, quamdiu vives, mihi ut usque servias,
Operam dabo, et spondeo libens. *Lucip.* Quid si male
Servirem? *Claud.* In pistrinum, vel in crucem darem.

Lucip. O misera vitæ ratio! *Claud.* Quid ais, Pollio?
Vin' tu mecum una ire ad Tropæonium? *Poll.* Libet.

Claud. Heus tu, postquam nos usque illuc deduxeris,
Redi statim, et cum caupone aliquo conveni
De prandio. *Lucip.* Quale? *Claud.* Satis fore tria autumo;
Pastillos, carnem, frictas et loligines.
Intellectin' ? *Lucip.* Teneo. *Claud.* Quod nempe sit satis
Duobus convivis. *Lucip.* Duobus? *Poll.* Quippini?

Lucip. Quippe rationem non belle inieris, mi here:
Tres, ni fallor, erimus convivæ, non duo.
Claud. Ita ne? Tun' quoque nobiscum accumbes, verbero?
Lucip. Tecum accumbam, nec ne, id mea non interest:
Jeiunem vero, an non, id plurimi interest.

Claud. Non tibi sat est, helluo, si mensæ devores
Reliquias? *Lucip.* Num canis ego sum, qui devorem
Reliquias lantæ hujusce mensæ, ac opiparæ?

Claud. Ne obloquere, furcifer ¹⁾, secus tibi brachia
Hoc fuste contundam: quod mandavi tibi,
Tacitus exequere. Neve mutti. Stas adhuc?
Adhuc stas? *Lucip.* Ego vero non vado; nam viæ
Lassus sum, fame pereco, genua mihi labant.

Claud. Non vadis, bellua tu procax, mastigia ²⁾?
Male peream, ni exemplum in te statuam hodie
Ego. *Lucip.* Hui, hui, hui serva sis me, bone ³⁾.

¹⁾ Acriter in servum.

²⁾ Polionis opem implorat.

³⁾ In servum incurrit, et fuste datat.

- Poll.* Iam porce sis, *Claudi*. *Claud.* Sine me nunc, *Pollio* ¹⁾.
Men. Quid turbarum est hoc? *Claud.* Poenas volo ego sumere
De pessumo mancipio, nullis moribus.
Men. Parcas rogo. *Claud.* Ne intercedas, servus est meus.
Men. Sed aliena in domo huc inferre non licet
Pedem, uisi meo ex arbitratu. *Claud.* Ergo foras
Meum servum extrudas. *Men.* An servu' tuus siet,
Ignoro. *Claud.* Ni tradas, ad Praetorem statim
Adibo. *Men.* Nunc recte inquis, cum mandaverit
Praetor, tradam illico. *Poll.* Iam sine me ²⁾. Heus, *Lucipor*,
Ne paveas, accede huc, permitte te mihi.
Lucip. Tuae me committo fidei. *Poll.* Veniam ab hero
Supplex exposce, impetrabis, credas mihi.
Lucip. Peccavi, fateor, here belle et dulcissime ³⁾:
Nam malesuada fames in nasum conciverat
Bilem misello. Crimen agnosco meum.
Poll. Age, *Claudi*, ignosce: fidelis est homo, et frugi.
Claud. Age, ignoscam; modo tale id ultra ne patret.
Lucip. Sic spondeo. Sine nunc, tibi manus deosculer.
Claud. Abi, quo mandavi. *Men.* Tibi nunc gratulor
Sodes, cum servum sine vi recipaveris,
Ignosces mihi etiam, spero, si non tibi animo
Obtrectandi, sed ut ira defervesceret,
Interessi. *Claud.* Peperci jamdud, bone,
Et grates habeo. Vale. *Men.* Di vos salvos velint.

¹⁾ Non audito *Polliōne*, servum fuste petiit, qui in *Thermapolium* fugit. ²⁾ *Pollio* belle persuadet utrumque.
³⁾ *Gentibus* flexis veniam implorat, qua
Hinc *Menedemus* exit, servique tu- obiecta, manum osculatur.
telam agit.

ACTUS SECUNDI

SCENA PRIMA

TROPHONIUS et GETA.

Domt.

- Troph.* Quid est, Geta, quod claudicas? *Get.* Cum currerem,
Ut quod jussisti, strenue exequerer, per viam
In lapidem iniegi grandiusculum, pedem
Qui subvertit; eo nunc mihi dolet acriter.
Viarum curatores, Di vos perduint.
- Troph.* Cum lapidum ubique locorum jaceant tot strues¹⁾,
Nae tu fortunatus homo es, qui unum offenderis.
- Get.* Ut suave est, here mi, ridere alienis malis!
- Troph.* Mirabar, non ridebam. Tu interim heic sede,
Remittat dum dolor, et quiesce paullulum;
Suos humanum in servos addeceat esse herum.
At illud dubito, recte, nec ne somnii,
Quod dormienti objectum est, vigilans memineris:
Nam trahere ad terras tum pisces tibi visus es,
Nunc lapidem traxisti tuo cum incommodo.
- Get.* Pergin' joci? *Troph.* Non jocos, sed somnium
Cum re confero. *Get.* Nondum occidit dies: ubi
Occiderit, nec cum re congruerit somnium;
Tum tibi justa erit expostulandi occasio,
An non, tractis retibus, una cum piscibus
Algas, et lapides saepe mixtos vidimus?
- Troph.* Argutum enimvero hominem, nec facilem capi!
Quid pes? dolet ne adhuc? *Get.* Remisit nonnihil.
- Troph.* Consurge, et si qua...²⁾ Audistin' Pulsantur fores:
Accurre. Adeste mihi, Laverna, et Mercuri.

¹⁾ Irridens Trophonius haec loquitur. ²⁾ Pulsantur fores.

SCENA SECUNDA

GETA, CLAUDIUS, POLLIO et TROPHONIUS.

Dom. Trophonii.

- Get.* En Claudium, qui tecum colloqui cupit.
- Cl. et Pol.* Salve, o Trophoni. *Troph.* Di vos quoque salvos velint.
Sedete. Quisnam, Claudii hic est, quem una simul
Huc tecum adduxisti? *Claud.* Popularis hic meus,
Qui a puero junctus est amicitia mihi.
- Troph.* Quod illi nomen? *Poll.* Pollio. *Troph.* O laetum diem!
Meam qui tales adduxit domum hospites!
A Prochyte ne estis, ut mihi retulit meus
Servus, an aliunde? *Claud.* A Prochyte. *Troph.* Semel illam insulam
Vidi: nil berce vidi unquam amoenius.
- Claud.* Tuam putato esse illam, non dico insulam,
Meam sed, quaecumque est, quam illic habeo, donum.
- Troph.* Urbane facis, et amice: si quando opus erit.
Sed officiorum satis adhuc. Abi hinc, Geta.
- Get.* Abeo ¹⁾. *Troph.* Quid est, quod me conventum volueras?
Si quidquam possum (possum autem parum admodum),
Tua illud omne causa facturum puta.
- Claud.* Pridem me docuit fama, quanta in advenas
Tua esset comitas. *Poll.* Idcirco potissimum
Convenit te. *Troph.* Ergo quaecumque tibi erunt opus,
Eloquere. *Claud.* Sponden' mihi fidem et silentium?
- Troph.* Spondeo, ne dubites. *Claud.* Chremes mihi meus pater,
Qui Brutii natus Prochytensem conjugem
Dein duxit, atque eo fortunas transtulit
Suas omnes, abhinc, ut puto, decennium,
Cum bello, et caede miscerentur omnia,
Duasque in partes esset scissa civitas:

¹⁾ Recedit Geta.

Turbas vitandi gratia, domesticis
 Compositis rebus, noctu aufugit elanculum.
 Varios post errores (neque enim necesse est omnia
 Persequi) Alexandriae tandem ante hos quatuor
 Annos fixit sedem, ut rescivi ex litteris.
 Illie mercatori se consortem addidit:
 Benigna adrisit sors, belle ut succederent
 Cuncta: aucta res brevi, et negotiatio.
 Non semel interea missa ad me pecunia:
 Nunc oleum, nunc vinum mandavit, ut emerem:
 Novissime bis mille misit aureos
 Cum epistola. Sed hanc nec ego, nec e meis
 Popularibus quisquam omnino potis fuit
 Interpretari: aegyptia scriptam puto
 Lingua. Hanc ob causam, cum rescissem te probe
 Illam callere, epistolam ad te detuli:
 Interpreteris, rogo. Non de nihilo, arbitrator,
 Fuit, quod non sua usus sit lingua: latet
 Aliquod fortasse: hoc est, quod me sollicitum habet.
Troph. Ne sis sollicitus. Cedo mihi sis epistolam.
Claud. Eeram ¹⁾. *Troph.* Pecunia, quam tu una eum epistola
 A patre modo narrabas missam ad te, domi
 Relicta, opinor, abs te, non usque huc fuit
 Adlata tecum. *Cl.* Imo hercle illam huc usque attuli,
 Ne, si quid heic emendum mandasset pater,
 Rursus redeundum esset Prochyten. *Troph.* Scitissime;
 Sed cave, ne cauponi concedas cuiquam.
Claud. Non est quod moneas. *Poll.* Nota cauponum fides.
Claud. Quod si quae mandat pater, haec me diutius
 Heic immorari jusserint, ego neminem
 Praeter te video, cui possim concedere.
Troph. Facis amice, quando sis de me existumas:
 Sed quid sit faciendum, vix, lecta epistola,
 Fiet palam. *Cl.* Lege ergo sis ²⁾. *Troph.* Hem! quid lego ³⁾?

¹⁾ Educit epistolam.²⁾ Dui epistolam legendam.³⁾ Mirabundus epistolam oculo per-
 currens ait.

- Quas haec ambages, quae loquitur mysteria?
Claud. Quid est, Trophoni? *Pol.* Quae te nam admiratio
 Legentem incessit? *Troph.* Magna sunt, quae praedicat
 Epistola, atque eadem partim mehercule
 lucunda, partim vero tristia nonnihil.
Claud. Quid audio? *Pol.* Satin' salvus pater? *Satin'*
Salvae res? *Pol.* Trophoni, nolito, amabo te,
 Diutius nos suspensos, atque anxios
 Habere. Pro tua in nos benevolentia,
 Si grave non est, latine totam epistolam
 Eodem veritas, quo exarata est ordine.
Troph. Haec hercle enimvero multo, quam creditis,
 Salebrosior opera est, et longior labos.
 Nec sum potis id facere, ut par est, ex tempore:
 Immane quantum distat ab altero alterum
 Loquendi genus. Haud congruunt vocabula,
 Hand sibi utriusque linguae stylus, et dictio
 Respondent. Super haec non longe est meridies,
 Et stomachus a jejunitate mihi latrat:
 A prandio, cum cerebrum calet, et mens viget,
 Libentius faciam hoc, atque expeditius.
Claud. Ut inbet. *Troph.* At si hospitii vos non pudet mei,
 Accumbite heic mecum una, et corpus reficite;
 Non deest domi fors, quod satis siet tribus.
Claud. Pro accepto habebimus. Condictum est prandium:
 Secunda a prandio huc ad te redibimus,
 Vertendi epistolam ut justum sit otium.
Troph. Recte putas. *Cl.* Vale. *Troph.* Valet vos quoque.

SCENA TERTIA

TROPHONICUS et GETA.

- Troph.* Non thynnulus¹⁾, Geta, sed cete maximum
 Aut jam captum est, aut capiendi certissima

¹⁾ Claudius, et Pollio Iristia quaedam ²⁾ Lactabundus haec secum Tropho-
 suspicientes haec loquuntur. nios disserit.

- Spes est. *Get.* Ego autem ¹⁾ expectabam de prandio
 Ut meminisses: prope jam meridies adest:
 Jam caligant oculi; sibi prae fame caput
 Non constat equidem. *Troph.* Id unum curas scilicet.
Get. Quidni curem, quod curato opus est maxime?
Troph. De prandio, Geta, post modo videbimus,
 Quod lautum, Ecator, fore confido, atque opiparum.
 Nunc hesternum quod nocte tibi per somnium
 Visum est, hoc opera tota, et totis viribus
 Trahendum ad litus rete, et ponendum in vado,
 Priusquam cete illud dilabatur foras.
Get. Ast, here mi ²⁾, mellitissime, qui tantum potest
 Trahi cete vacuo, atque inani corpore?
Troph. Mentis, non corporis ad id opus est viribus.
 Mente doli, mente fabricantur retia,
 Quois homines capiuntur non ita cauti sibi.
 Audistin? *Get.* Teneo. Torque igitur, et excute
 Fecundum pectus, quaslibet fallacias
 Innecte, dolos instrue, concinna, parturi.
 Si quâ juvare te potero, faciam lubens;
 Dum ne cete illud unus ipse absorbeas.
Troph. Cum poscet usus, tum tu suppetias feres.
 Nunc affer huc chartam, et thecam calamariam.
Get. Eccas. Numquid praeterea? *Troph.* Dum scribo, fores
 Si quis pulsarit, longe abesse dicito.
Get. Parebo. *Troph.* Tu interim, si qua opera mox tibi
 Praestanda in rem praesentem, praestare ut queas,
 Dum scribo, stomachum refice aliquantillo cibo.
Get. De prandio, et de coena cum sermo incidit,
 Ut diminutiva haec hero placent meo!
 Tantillum, aliquantillum, pauxillum, frustulum.
Troph. Abi hinc, et sine nie, quod agendum, agere sedulo.
 Ad atrium mane, praesto ut sis, si vocem.
Get. Abeo: at quo vires revocem? *Troph.* Pane, et rapulis.
Get. Euge, mi venter, euge pane et rapulis.

¹⁾ Geta de prandio sollicitus nihil curat verba heri. ²⁾ Ut supra.

Troph. Laverna mea ¹⁾), mihi Juno, tuque o Mercuri,
 Meus Jupiter, adeste ambo vestro mihi
 Numine. Vobis ego auctoribus, epistolam
 Interpretari me non posse ex tempore
 Caussatus sum, illis ut dimissis, commodum
 Daretur spatium concinnandae machinae:
 Per vos coeptum opus, ad umbilicum adducite.
 Opima objicitur praeda, his mille aurei.
 Jampridem mihi si comminiscar debitam
 Illam pecuniam, idque in hisce litteris
 Perscriptum confirmem; quid fiet postmodo,
 Si testes tabulas postularit Claudius?
 Non placet hoc commentum: potest falsi argui.
 Si mutuo acceptam olim... vix credet puer:
 Nunc hoc arridet... non credibilis fabula:
 Obstat lex, obstat mos, repugnant tempora.
 Sicine ²⁾), cum mihi vestra opera maxime est opus,
 Ambo deseritis me, Laverna et Mercuri?
 Ecquid peccavi? ecquid vestra extemplo aruit
 Illa illa fallendi vena? Ecquid illico
 Praestigiarum exhaustum est promptuarium?
 At at pulchrum hercle inventum occurrit tempore;
 Convicia plus interdum posse, quam preces,
 Usque adeo verum est ipsos etiam apud Deos.
 De quodam multis hinc ante annis condito
 Thesauro fingam indicium facere epistolam:
 Missam pecuniam mentiar, ut scilicet
 Ad eruendum illa uteretur filius:
 Hoc ubi bonus combiberit Claudius, mihi
 Operam dabo demandetur negotium.

Get. Illeus ³⁾), quis fores pultat? nullus domi est berus,
 Pergin' pultare? ad pluteum sedet: haud est domi:

¹⁾ Trophonius, implorata suorum Deorum
 ope, domum instruere secum cogitat.
²⁾ Ira succensus haec in suos Deos effudit.
 At postea voti compos factus scelestum
 illud dicit Comicieta etc.

³⁾ Fores pultantur. Geta in atrio
 stans, ac panem cum rapulis
 manducans haec loquitur.

Abi in malam crucem. Proh sanete Jupiter!
 Ne rapulum quidem quiete arrodere
 Simunt! omnes tamen rogatum ventitant
 Huc, nemo, nemo unus datum. Omnes, qui rogent,
 Adsunt: ast dandi verbum pene intercudit:
 Quo magis heri mei laudo prudentiam,
 Qui, quod dare nolunt, ipse aufert fallaciis.

Troph. Heus tu, Geta. *Get.* Quid? explicit felicitet,
 Quod explicandum tibi fuit negotium?

Troph. Scilicet, et ex sententia. *Get.* Licet modo
 Insinuare huic negotio de prandio
 Verbum aliquod? *Troph.* Nae tu quantus, quantus es, Geta,
 Totus gula es, totus venter: necdum tui
 A permolendo requierunt dentes satis,
 Iterum mens redit ad patinas, iterum hiat gula.
 Venator, visa avi, per saxa, per nives
 Gravem duceus anbelitum, eibi immemor
 Nullum insectandi finem, nisi, capta avi, facit:
 Tu, grandi viso thynno, patinas unice
 Crepas, et lances? Anne expectas, helluo,
 Ut ille sponte in tua desiliat retia?
 Nil sine labore multo homini datum est. *Get.* ¹⁾ Ohe
 Quanta aggeris, here mi! tu patinas, et dapes,
 Nescio, quas narras; ego vix novi rapula,
 Quae conciant magis, quam depellant famem.

Troph. Jam auribus ausculta arreetis, et rema omnem bene,
Get. Ausculta, eloquere. *Troph.* Bis mille aureos pater
 Ab Alexandria misit Claudio: addidit
 Epistolam, quam interpretandam detulit
 Claudius ad me, quod lingua non scripta est sua;
 Ego, sententia mutata, ita reddidi,
 Thesaurum ut de quodam moneret Claudium
 Nostra hae olim in vicinia recondito:
 Hoc simul audierit Claudius credulus homo,
 Rogabit, arbitror, enixe, si quam queam

¹⁾ Fastidiosus, et esuriens sic respondet domino.

Ad inveniendum praestare operam, hanc ne negem.

Tunc ipse consulendum dicam, quod domi est,

Mercurii antiquum simulacrum, prout saepius

Id a me factum prospere et feliciter.

Get. At nullum novi, quem tute colas hic domi
Loquentem Mercurium. *Troph.* Haec scilicet est fabulae
Pars illa, quam tu agas, necesse est, mi Geta,
Ut illi veniant ad nos bis mille aurei.

Get. Egon' ex Geta Mercurius! miranda aedepol
Metamorphosis! Vereor, ut ex sententia
Succedat. *Troph.* Ne dubites, ne animum despondeas;
Multo est, quam opinaris, facilius fictio:

Mercurii ritu indutus, faciam, ut pareas.

Habebis in capite petasum, virgam in manu,

Alas ad talos, et vultum laetum feres,

Ut Claudium erigas ad spem, et credat tibi

Respondenti. *Get.* At rogatus quid respondeam?

Troph. Istuc ibam. Neque enim, quod refert maxime,

Hoc fugerat me. Quid rogaturus siem

Ipse, et quid in rem respondendum sit tibi,

Haec te docebit chartula ¹⁾; hos mandes velim

Memoriae versus bene: brevissimum est, vide.

Get. Pauca haec? praeterea nil? *Troph.* Nihil. *Get.* Factum puta.

Troph. Ast illud obsecro, caveas, ne rideas.

Get. Ne dubita: tute ipse aeneum arbitrare

Me subito factum. Sed succedere omnia

Fiemus belle, ac credere Claudium et tibi,

Et mihi, venire etiam ad nos bis mille aureos;

Ad thesaurum cum fuerit ventum, unde erues?

Troph. Non absque Divûm hoc coeptum est facinus numine:

Ipsi, quam minime reris, monstrabunt viam.

Get. Quam doctus ²⁾, ac fideus mihi verus obtigit! adhuc

Tamen superest, bere mi, unum, quod rogem.

Troph. Quid ais? *Get.* Mercurii si partes bene egero,

¹⁾ Chartulam profert, in qua duo scripti versiculi, quam et porrigit Getae.

²⁾ Admirum dictu.

Si mea quid te opera juverit, quid praemii
 Feram? *Troph.* Nummorum tertiam cum pileo.
Get. Euge, euge tertiam nummorum, et pileum!
 Vel Plutonem agerem, hoc ut referrem praemium.

SCENA QUARTA

CLAUDIUS, POLLIO et LUCIPOR.

In via.

- Claud.* Aut nullos esse heic aediles escarios,
 Aut esse ejusmodi reor, quasi non forent;
 Nulla est mensurae, nulla prorsus ponderum
 Cura, aut pretii; vendunt omnes, quanti libet;
 Duplo majoris certe, quam Neapoli,
 Quam Prochyte, cum tamen merces minoris heic,
 Quam alibi parentur. *Poll.* Quanti, sodes, prandium
 Stetit? *Claud.* Quanti? denariis septendecim.
- Poll.* Quid audio! atqui tria tantum apposita, et quidem
 Parce admodum, ut obsonaverimus potius fanem.
 Ego hercle esurio mage nunc, quam ante prandium.
- Claud.* Adeo ne parvi pendi heic annonarias
 Leges! *Poll.* Pingues heic suspicarer aedepol
 Costas subinde, ne latrarent, objici
 Canibus. *Claud.* Sed annonae qui praesunt, hos satis
 Assiduus audio esse, et censu divite.
- Poll.* Ut ut se res habet, heic male porro vivitur.
- Claud.* At, Pollio, quota hora est? *Poll.* A meridie
 Secunda ferme est. *Claud.* Quid moramur longius?
 Fors nos Trophonius expectat. *Poll.* Recte mones.
- Lucip.* Here, nauclerus rogat, si quae se occasio
 Dederit, abeatne, an te mameat, donec velis?
- Claud.* Ad portum expectet, volo, donec redivero.
 De naulo ipse operam dabo, mecum ne expostulet:
 Tu mox sequere nos ad Trophonium. *Lucip.* Lubet.

SCENA QUINTA

GETA et TROPHONIUS.

Domus Trophontis.

Get. Prope est, optior, Claudius ut veniat. *Troph.* Quota est?

Get. Trientem ferme absumus a conducta. *Troph.* Bene,
Quae jussi discere, edidicistin? *Get.* Optime.

Troph. Quando igitur jam prope est, ut redeat Claudius,
Concede sis hinc intro uunc in cubiculum:

Ibi Mercurii ritu, uti te elocui modo,
Induere: in capite petasum, tum alas ad pedes,
Virgam et crumenam in unanibus habeas: rumina,
Et recole, quae mandasti memoriae, probe.

Get. Hoc pol non minus est curae mihi, quam tibi, mi here.

Troph. Abi ergo; cogita nummos, et pileum.
Aut animo fallor, aut ego rete texui,
Ut, qui cete illud elabi quest foras,
Nullus videam. Si qui fortasse erunt, quibus
Hoc consilii non sat probatur, nil moror:
Quid enim? pari referre par scitissima
Vetus lex: vetus est quoque proverbium:
Cum Care carissa: furto passim vivitur:
Ab imo ad summum omnes et hanc artem optime
Norunt, et strenue exercent: cur non ego?
Sed pultantur fores: hic certe est Claudius.

SCENA SEXTA

CLAUDIUS, FOLLIO et TROPHONIUS.

Apud Trophonium.

Claud. Salve sis iterum, Trophoni. *Troph.* Carissimae
Vos quoque salvete animae. *Claud.* Vertisti jam reor,

- Epistolam. Troph.* Versa atque exscripta. Ecceam lege ¹⁾).
Claud. Lege sis tu, Pollio, ut si quid fors tristius
 Nuntiet, hoc audientem me feriat minus.
Poll. Recte putas: nec gerere amico me piget
 Morem. « Salutem multam dicit Claudio
 « Pater. Praeter Puteolanae urbis moenia,
 « Abhinc annis centum sub terra conditum
 « Thesaurum ingentem certo indicio comperi:
 « Id, quia redeundi istuc spes, atque animus erat,
 « Celavi adhuc omnes. Nunc, quando jam adpetit
 « Dies extrema, nec morbi vim avertere
 « Spes ulla est reliqua; id te, fili carissime,
 « Doceo. Aegyptiae scribo, quod aliena manu
 « Ut cogor, jam destitutus viribus.
 « Obtulerit fors heic diversantem quempiam
 « Aegyptium, explanare qui valeat tibi;
 « Corراس, quod reliquum fuit pecuniae,
 « Id ad te mitto, fili, bis mille aureos,
 « Ad eruendum ut utaris, si usus siet.
 « Tu vive memor mei, fili dulcissime.
 « Alexandriae, nonis Januariis.
 « Prochyten. *Claud.* Hui ²⁾! nulla posthac spes erit mihi
 Videndi patrem, nullas posthac litteras
 Illius exaratas, heu! manu legam?
 O tristes litteras! o tristem nuntium!
 O me miserum! *Poll.* Quo, Claud, haec ejulatio?
 Quid te, obsecro, quid absentem patrem tuae
 Juvant lacrimae? Mortales omnes nascimur:
 Non domus heic nobis data, sed diversorium:
 Nec mancipio vitam accepimus, at usui.
Troph. Humanitus, Pollio, facit. Sine sis satis
 Illum naturae facere id; aequum est, et pium.
Claud. Si quanta sit jactura patrem amittere,
 Nosses, Pollio; miserandus nae ego magis tibi

¹⁾ Porrigit epistolam.

²⁾ Audita patris aegra valetudine, miserum in modum lamentatur.

Viderer, quam objurgandus. Tibi, cum esses adhuc
In cunis, mors praeripuit patrem: hoc tu, neque
Quid sit frui praesente, nec quid perdere
Scisti unquam. Levius est hercle non noscere
Bonum, quam noto, et parto misere orbarier.

Poll. At mecum multo est gravius olim actum aedepol.
Cui cum patre omnis res interii funditus,
Ut vix labore multo vivam duriter;
Tu, patre amisso, multo es factus ditior.

Claud. Quid haec ad patrem? *Poll.* Parvi, intelligo, admodum
Pretii, sed tamen aliquantilli. Certe minus
Fert damnum, si quis unum amittat pallium,
Quam pallium si amittat, et subuculam.

Claud. Ast thesaurum illum, Pollio, qui, amabo te,
Aut divinare, quo olim defossus fuit,
Aut eruere inventum, qui, inquam, simus potis?

Poll. Si id te mordet, Claudii, bono sis fac animo:
Opus belle qui coepit, perficiet quoque:
Aliquem, mecastor, benevolum puto Deum
Nos huc deduxisse ad Trophonium manu.

Claud. Recte putas. Quid ais Trophoni? Num potes
Ad id deferre quidquam operae? si quam potes,
Per quid quid usquam habes tibi carissimum,
Ut conferas, obsecro: neque (sic me ament Dii)
Tuam inremuneratam abire sivero
Operam. Si res succedat ex sententia,
Tolles de thesauro, quantum tumet velis.

Troph. Apage sis verba haec: satis est, qui vivam, domi.
Sed id, quando Deum non factum est ingratiis,
Quos vobis video benevolos et propitios,
Libenter, quam operam potero, commodavero,
Si tamen addixerit Mercurius. Qui potest
Nam fieri, ut addiscam, quonam sient loco
Nummi defossi, hoc inconsulto numine,
Quod ego domi colo? Usurpavi jam id quidem
A puero, nec sefellit unquam me Deus.

Poll. Pie quidem et prudenter, Trophoni, facis:

- Adsit Deus, oro. Consule ergo. *Troph.* Vos quoque
 Adsitis consulenti, volo. *Poll. Claud.* Labet quidem.
Troph. Res vestra agitur. *Poll.* Equando fiet? *Troph.* Illico.
 Obvelato at capite adesse opus est. *Poll.* Ut lubet,
 Modo velum praebeas. *Troph.* In promptu est scilicet.
 Unus praeterea, aut alter calamum habeat, volo,
 Si quod dignetur Deus oraculum dare,
 Ne quid mente excidat nobis. *Claud.* Recte antuinas:
 Huic rei satis est Pollio, cujus manu
 Nil est velocius. *Troph.* In scribendo scilicet?
Claud. Mirum, ni dixerim in furando. *Troph.* Apage, apage
 Verba isthaec. Sinite ergo, huc quid quid opus est, adferam ¹⁾.
Claud. Quid ais, Pollio? *Poll.* Mira equidem sunt, quae praedicat
 Hic homo tanta cum confidentia. *Claud.* Modo
 Videbimus. *Troph.* Velo ²⁾ quisque obnubat caput.
 Accipe stylum tu cum tabella, Pollio.
Poll. Cedo. *Troph.* Genuflexi, et ambo arrectis auribus,
 Demissisque oculis, non sine reverentia
 Adeste. *Claud.* An numen intueri non licet?
Troph. Licet, sed limis oculis, et reverentibus.
Claud. Par est ³⁾. Tremisco totus. *Poll.* Cor mi palpitat.
Troph. O summi Jovis ⁴⁾, o Divum quidquid uspiam est,
 Fidissimus nuntius, o cui nil additum,
 Nil fuit unquam obscurum, o facunde Mercuri,
 Primis mihi ab annis, o colende ad ultimam
 Senectutem, adfulge jam nostris mentibus
 Benigno lumine, atque arcana pandito,
 Latetne quis thesaurus in hac vicinia?
Claud. Heu me ⁵⁾! Vidistin? *Poll.* Vidi, sed nihil audii.
Troph. Da trismegiste, precor, indicium: da bone.
Mer. « Dona ⁶⁾ Serapis habet, donis placandus et ipse:
 « Si large dederis, postmodo dives eris.

¹⁾ Abiit intro.⁴⁾ Ad Numen loquitur.²⁾ Vela refert, et stylum cum tabella;
 quae dividit, Tum monet, ut genu-
 flexi etc. adsint.³⁾ Contremuit Numen.⁵⁾ Verbo Mercurii cum gravi pausa
 proferatur, et syllabotus.⁶⁾ Timore ac reverentia pressos se indicant.

- Claud.* Audisti sodes? *Poll.* Pulchre, cunctas syllabas.
- Troph.* Macte esto, Mercuri, novis honoribus
Vere trismegistus: grates tibi maximas
Habeo, majores habiturus, dum vixero.
Sine, osculari tibi me genua. Ave et vale ¹⁾.
- Claud.* Proh mirum! *Poll.* Auribus, atque oculis vix credo meis.
O te mortalium, quot quot sunt, omnium,
Trophoni, felicissimum, domi tuae
Et audientem, et respondentem habens Deum!
- Troph.* Oraculum exscripsisti, Pollio? *Poll.* Ita quidem.
- Troph.* Cedo sis ²⁾, hui! hui! Quae litterarum monstra sunt?
Quid adpinxeris heic, nescio. *Poll.* Cum mi manus
Tremisceret, pilique omnes horrescerent,
Non satis habes, si tantum factitaverim?
Verum da mihi tabellam, egomet interpretor.
- Troph.* Lege sis ³⁾. *Poll.* Dona Serapis etc.
- Troph.* Belle quidem: nemini: sunt verba ipsissima,
Quae numen fudit. *Claud.* Sed sibi quidnam velint,
Non intelligo. *Poll.* Trophonii munus id erit,
Cui familiare est colloqui cum Numine.
- Troph.* Sine colligam me tantisper ⁴⁾... Belle omnia.
- Claud.* Piscatus es sententiam? *Troph.* Tenui quidem.
- Claud.* Pande igitur. *Troph.* En: DONA SERAPIS HABET, videlicet:
Thesaurus ad Serapidis heic in proxumo
Situs est. DONIS PLACANDUS ET IPSE scilicet
Nummorum vis prius danda est Serapidi;
Nam si LARGE DEDERIS, DIVES ERIS POSTMODO.
- Poll.* Rectissime. *Claud.* Quam magnus, Trophoni, vir es ⁵⁾!
Divisque quam gratissimus! Sine, osculer
Tibi manus. *Troph.* Grates habeto Numini:
Vide nuue, quam bene tibi consuluit poter,
Qui etiam nummos ad eruendum miserit.

¹⁾ Mercurii genus reverenter osculatur, caput inclinat, et abit.

²⁾ Tabulam manu capiens, quae metu pressus scripserat Pollio, miratur.

³⁾ Legit tabellam.

⁴⁾ Pausisper meditatatur, tum oraculum explicat.

⁵⁾ Mirabundus haec ait. Tum manum Trophonio osculatur.

- Claud.* Pater ¹⁾, oh! pater mi, quid nunc me nummi juvant,
Absente te? *Poll.* Quid nunc juvant te lacrimae?
Nonne satius nunc est morem gerere patri?
- Troph.* Probe monet. Da nunc ergo operam huic rei:
Post debitum persolves officium patri.
- Claud.* Quantum ergo nummorum offerendum a me putas
Serapidi? *Troph.* Isthoc latet, arbitrio face tuo.
Unum sed moneo: hinc omnis absit parcitas;
Nam quo plus dederis, plus certe auferes; puto
Id, ni fallor, monuit oraculum. *Poll.* Putat
Recte. *Claud.* Suades ergo omnes his mille aureos
Offerre Numini? *Troph.* Ego quidem nil suadeo:
Fortasse pater id monuit, qui tibi miserit
Pecuniam. Fac pro tua prudentia:
Tua isthoc interest. *Claud.* Ergo faciam, ut mones.
En sacculum cum nummis: hinc decem modo,
Si quid forte impenso est opus, sumam mihi,
Reliquum omne tibi credo, Trophoni. *Troph.* Parce sis,
Claudi, aliena penes me ne sit pecunia.
Tute, precor, habeas, tute Numini offeras,
Tnismet manibus. *Claud.* Nimium cautus es, bote.
- Troph.* Sic usurpavi a puero. *Poll.* Pol! Quantus vir est!
- Claud.* Saltem ne deseram, precor, mage cum est opus.
- Troph.* Ut te nunc deseram? Apage verbo huiusmodi:
Tuus sum. *Claud.* Dic ergo, quid faciendum siet?
- Troph.* Quando sol occidit, primam post vigiliam
Noctis, tacite ad Serapidis ambo accedite,
Nummosque vobiscum adferite. Illic ego simul
Adero: ligonem, et quidquid ad eruendum opus est,
Apportabo, ut res succedat feliciter.
- Claud.* O amicorum optime, quas tibi reddam gratias?
- Troph.* Nil te mihi debere autumo, quin ego tibi:
Nam de alienis fortunis laetari, lucro
Appono. *Claud.* Immo quidquid sors mihi concesserit,
Tuum erit id totum: mihi dabis, quantum voles:

¹⁾ Lugens ait.

Tibi acceptum referam. *Troph.* Numquam id fiet, bone.
Fructus, quae tibi sors obtulit merito tuo.

Poll. Quam bonus est! *Troph.* Vel fallunt aures ¹⁾, vel nescio,

Quis pultat. *Claud.* Lucipor fortasse adest meus.

Poll. Is est, ecceum. *Claud.* Ubi, malum, moratus tandiu?

In cauponam aliquam te coniecisti, arbitror.

Lucip. Quam narras cauponam? Has mihi fecit moras

Nauclerus, quicum longum certamen fuit,

Ut expectaret; sed nullis pervincere

Obfirmatum animum potui conditionibus.

Claud. Hunc ego... ²⁾ Trophoni, ad condictam illuc venero.

Troph. Valet: uterque vestrum ori obdat pessulum;

Unum silentium rem potis absolvere.

Claud. Di linguam eradicent mihi. *Poll.* Si quid mutiat ³⁾.

¹⁾ Fores pultantur.

²⁾ Absent.

³⁾ Minutibundus sermonem abruptit.

ACTUS TERTII

SCENA PRIMA

GETA et TROPHONIUS.

Dom.

- Get.* Nummorum tertiam cum pileo ¹⁾. *Troph.* Io, Geta ²⁾,
Io: non verisimilius agi fabula
Poterat. *Get.* At quanti stetit id! Pene ruperat
Distenta compressus risus praecordia.
- Troph.* Nil pol! verebar magis. Hoc cavi sedulo,
Ut ne in oculos tuos incurrerent mei.
- Get.* Quin illuc potius, unde modo divertimus,
Revertamur? *Troph.* Quo? *Get.* Ad nummos nempe, et pileum.
- Troph.* Ne dubites. Haud pol! ego meam ut hodie fidem
Desideres, faciam: sed sine veniant prius
Nummi. *Get.* Quid audio ³⁾? An non venerunt adhuc?
- Troph.* Non: deponere apud me volebat Claudius,
Illos ego vero contrectare nolui.
- Get.* Ecceur? *Troph.* Ut validius meam abstinentiam
Probarem illi. Suismet sine pecuniam
Manibus Deo offerat: mox cum avolaverint;
Non mihi, sed sibi damnum, vel potius Numini,
Acceptum feret. *Get.* Ut cantus et sapiens vir es!
Verum dic, quo pacto avolabunt aurei?
- Troph.* Id curandum ⁴⁾, ut recte claudatur fabula.
Tene igitur. *Get.* Ausculto. *Troph.* Mox ad Serapidis,
Ut condixi, bonus ille cum pecunia
Adveniet: praecipiam, ut in ara Numinis

¹⁾ Laetabundus Geta inquit.

²⁾ Gratulatur Getae Trophonius.

³⁾ Stupet Geta.

⁴⁾ Gravitate maxima loquatur.

- Deponat; tum ipse merum procumbens humi
 Exoret Numen, acripere ne respuat
 Donum. Tum tu Serapis factus illico
 Gravem crumenam gipsata auferes manu,
 Et disparebis, ego procurabo reliqua.
- Get.* Nunc e Mercurio hanc Serapis iterum?
- Troph.* Quid ni? necatus est facillimus, modo
 Barbam adsumas, capiti et modum vice petasi
 Imponas; evadis Serapis illico.
- Get.* Quo pacto tunc dispaream, haud intelligo.
- Troph.* O quam tardus es! Illinc aufugies, et domum
 Te recipies cum nummis. Ille autem a Deo
 Sublatos censebit, Deoque gratias
 Habebit maxumas rapienti Numini.
- Get.* Quid fiet autem, cum thesaurus in aërem
 Abibit? *Troph.* Falleris, Geta, quam nobilem
 Thesaurum faciam mox defodiat Claudius!
- Get.* Quo pacto id ais, cum tibi nummus non suppetat?
- Troph.* Hoc nempe pacto. Alexandrinam mummiam,
 Quae a mercatore deposita est nuper domi,
 Hanc inter rudera deponemus elanculum:
 An non thesaurus is est penes Aegyptios?
- Get.* Hui ridiculum *)! Quid autem fiet Claudio?
- Troph.* Hanc Claudius *) quum, me juvante, effoderit,
 Sua delusus spe ejulabit, autumo;
 Sed se, sed patrem culpabit, vel Numina,
 Quae se deluserint. Mihi sane obloqui
 Haud quamquam poterit, qui rogatus opem tuli;
 Nec illius quidquam attigi pecuniae.
- Get.* Macte, here mi *), pro tua sapientia, dolum
 Invenisti, unde nequeat extricarier
 Bonus ille vir. Praesto sum ego tibi, stes modo
 Promissis. *Troph.* Ne dubites, promissa implevero.
 Agenda nunc, ad opus quae multa conferant.

*) Cum rion Geta evclpiti dicta.

*) Plaudii Geta.

*) Gravis Trophonius ait.

- Laetabimur. *Get.* Age. *Troph.* Capsulam cum mummia
 Succolles prius. *Get.* O quam gravis est! Proh Jupiter!
 Quantum hodie thesaurum aucupabit Claudius!
Troph. Et hunc sume ligonem. *Get.* Oh nimio plus me aggravas!
Troph. Utere pro baculo. *Get.* Fiet. *Troph.* Reliquum ego deferam
 Ornatum hoc sub pallio. *Eamus. Get.* Bono omine.
Troph. Tu praeceas: ostio clauso, te consequar ¹⁾.

SCENA SECUNDA

POLLIO, CLAUDIUS ET LUCIPOR.

Cum laterna tu via.

- Poll.* En templum adcedimus: servum admittere nūus
 Oportet. *Claud.* Bene mones. Mane heic tu, Lucipor,
 Cedo sis mihi laternam. Nos huc in proximum
 Divertimus parumper; tu vero redi
 Ad cauponam: fac instructa illie onania
 Sint ad coenam, et cubile: vade protinus:
 Horae momento nos illuc redibimus.
Lucip. Quid ais, here mi? Quonam pergam sine lumine?
 Difficiles per vias coementis obsilas,
 Et coeno? Nonne satius est, tecum ut simul
 Eam, et redeam? Non magnum sane temporis
 Compendium facies ad coenam, si prius
 Abeam. *Claud.* Rursum obloqueris mihi? *Poll.* I nunc, Lucipor,
 Ne paveas: pedetentim brevem absolves viam.
Lucip. Parebo. *Claud.* Recta illuc pergito. *Lucip.* Rectissima (*Abiit*).

¹⁾ Proceunt hoc ordine: Geta cum cap-
 sula imposita capiti, et ligonem ma-
 na tenens pro baculo: Trophonius

cum pallio, sub quo instructa
 quaedam deferit.

SCENA TERTIA

LUCIPOR ET PRAEFECTUS VIGILUM.

- Lucip.* Quid hoc negotii sit, non intelligo.
 Herus noctu hosce in anfractus incognitos
 Se insinuat una cum comite, et de industria
 Me abigit! Peream, ni explorem, quam rem gesserint.
 Hem! huc adventant armati homines cum lumine:
 Nocturni vigiles profecto hi sunt. Quidnam ago?
 Satiuss esse puto, securus si occurrero *).
- Praef.* Heus tu, siste gradum. *Luc.* Sisto. *Praef.* Quis es? *Lucip.* Homo, ut vides.
- Praef.* Bipedem melius te diceres. Unde es domo?
- Lucip.* A Prochyte. *Praef.* A Prochyte! Quid negotii heic habes,
 Quod nocturnus circumneas istaec per loca?
- Lucip.* Nihil negotii habeo, nisi ut hero obsequar.
- Praef.* Servusne es? *Lucip.* Et meo quidem infortunio.
- Praef.* Quis tibi herus? *Lucip.* Claudius Chremetis filius
 Prochytensis. *Praef.* Ubinam is est? *Lucip.* Id vero nescio.
- Praef.* Quo pacto nescis? *Lucip.* Hoc pacto: huc illum modo
 Deduxi: tum me rursus ad cauponam
 Dimisit: is cum socio, quo isset, nescio.
- Praef.* Quis illi socius? *Lucip.* Pollio conterraneus.
- Praef.* Quo se dederunt in viam? *Lucip.* Istac scilicet.
- Praef.* Huiusmodi negotium minime liquet.
 Mane heic tu nobiscum. *Lucip.* Ut lubet. *Praef.* Comprehendite.
 Occlude sis lumen: nemo jam muttiat.

*) Lucipor fit obviam Praefecto vigilum, apud quem hic sermo oritur.

SCENA QUARTA

PRAEFECTUS VIGILUM, GETA et LUCIPOR.

- Praef.* Nescio, quis huc adventat. Siste sis gradum.
Get. Quid sistam ¹⁾? Heu, heu me perditum. *Praef.* Dic, quis sies?
Get. Domum festinabam ego. *Praef.* Non id rogo. Potis
 Es dicere, qui sies? *Get.* Servus Trophonii.
Praef. Accede sis cum lumine. Item! larvatus est!
 Quid sic tremiscis? *Get.* Tertiana mi febris
 Adcessit multo cum frigore. *Lucip.* Nempe is Geta est.
Get. Propterea me hisce pannis involvi. Sine
 Abire me domum. *Praef.* Ecce tu creta oblitam
 Fers faciem? *Get.* Quia modo pede lapsus corruì,
 Lutoque faciem conspurcavi. *Praef.* Heu, heu miser!
 Heus vos ²⁾ istum excutite bene. Exsere sis manus.
Get. Heu me, perii ³⁾! *Praef.* Ecquidnam in terram decidit?
 Papae! nummorum sacculum ⁴⁾! Quin nurei
 Omnes. Nae febris est id remedium efficac.
Lucip. Hem! ille est nummorum sacculus, quem detulit
 Herus mane! *Praef.* Dic, bone vir, unde sumpseris?
Get. Cum lapsus essem, ut modo dixi, hoc inter pedes
 Forte inveni, quod impedimento foret.
Praef. Ita ne? *Get.* Ita me Dii ameut. *Lucip.* Dux ⁵⁾, iste sacculus
 Est Claudii heri mei; fortasse illi excidit
 In senita. *Get.* Heus, tu Lucipor heic? me nunc juva ⁶⁾.
Praef. Satis teneo. Ad furtum larvatus tu iveras;
 Hic vero agebat excubias? mastigiae,
 Scelesti. *Lucip.* Minime minime; illum vidi semel:
 Nil cum illo habeo negotii. *Praef.* Teneo satis.

¹⁾ Geta Serapidis ritu indutus cum sac-

culo nummorum deprehensus a Prae-

fecto vigilum hunc festivissimum ser-

monem cum eo facit.

²⁾ Geta nummorum sacculum projecit.³⁾ Vigilum usus excipit.⁴⁾ Lucipor sacculum agnoscens ducem

monet.

⁵⁾ Ad vigiles.⁶⁾ Geta servi opem implorat.

- Heus vos arcissima hisce ambobus vineula
Innectite. *Lucip.* Ego quid commerui. *Praef.* Mox videro.
- Get.* Hui, hui, hui! . . . innocens ego sum. *Praef.* Persuadeor.
Dic ergo, quis tibi hos nummos tradidit? *Get.* Heu, heu!
- Praef.* Ne plora, responde: si verum dixeris,
Fortasse impune abibis. *Get.* Herus mihi meus
Hos mandavit nummos, ut deferrem domum.
- Praef.* Cuinam surripuit? *Get.* Minime, minime surpuit;
Sed Claudius sponte obtulit Serapidi.
- Praef.* Serapidi? *Get.* Ita quidem: omnes adjuro Deos.
Praef. Quid herus tuus commune cum Serapide
Habet? Num ejus sacerdos est? *Get.* Id nescio.
- Praef.* Quomodo igitur Serapidi oblatis aurei
Ad ejus venerunt manus? Dic planius:
Secus, valde torqueo, mendacissime.
- Get.* Dicam; sed ignoscas mihi, qui parui
Hero? *Praef.* Tibi parcam, si dicas veraciter.
- Get.* Tene igitur rem omnem. Claudius ille epistolam,
Nescio quam, interpretandam detulit ad herum:
Illic litteras adulteravit, ut puto:
De condito thesauro in hac vicinia
Loqui illam finxit. Accensus tum Claudius
Potinodi desiderio, illum enixe rogat,
Ut sibi operam praestet suam. Is mendacio
Ut sit fides, Mercurium consulendum ait.
Mercurii autem personam imposuit is mihi.
Ego sibi consulenti responsum dedi,
Prout suggesserat: nempe ad Serapidis
Thesaurum grandem olim fuisse conditum.
Quem Numen aucupandum illi concederet,
Qui sponte nummorum obtulisset plurimum.
- Lucip.* O audax factum! o impium mendacium!
- Praef.* Tum vero? *Get.* Tum vero persuasit Claudio,
Ut his mille aureos, acceptos a patre
Cum litteris, offerret hos Serapidi.
Porro Serapidis me exornavit ritu,
Jussitque, ut oblatos nummos a Claudio

Ego Serapis, spectante eodem, numerem.
 Ut jussit, perfecti. Sublatos hinc domum
 Ferebam nummos. *Praef.* Oh! Papae! *Get.* Ipse me impulit.
 Ut facerem, adegit et promissis, et nūis.

Praef. Serapidis nempe haec sunt spolia. *Get.* Scilicet.

Lucip. O fraudis, o mendacii ultorem Deum!

Praef. Dic nunc, ubi est herus? Modo in Serapidis

Liqui, donec totam perageret fabulam.

Praef. Adeamus ergo simul ad templum, ibi videro,

An vera sint, quae narrasti. *Get.* Verissuma.

SCENA ULTIMA

CLAUDIUS, TROPHONIUS, POLLIO, GETA, LUCIPOR CUM PRAEFECTO.

Claud. Ad te, Trophoni, veni non fausto omine.

Troph. Ingratus nunc, Claudii, es, labores qui meos
 Sic male rependis. Thesaurum non ego tibi,
 Sed pater, atque Dei monstrarunt; nec hercule,
 Falsi fuere, quippe quia ditissimum
 Invenisti auro contra non carum, et quidem,
 In Aegyptum si hanc mummiā remiseris,
 Duplo rependent auri obrizi pondere.

Sed esto, fac te nunc Dei fecellerint,
 Anne in culpa ego sum, qui meam gratis tibi
 Opellam commodavi, quam petiveras?

Claud. Minime id ajo, Trophoni; sed meam queror
 Fortunam, qui cum patre bis mille amiserim
 Nummos. *Poll.* Non pot amisti, ut Trophonius
 Narrat, potius magno dedisti foenori.

Claud. Vacuus interea solido cum cadavere
 Domum redibo, ut passim quicumque videat,
 Illudat? *Troph.* Si lubet, apud me deponere
 Poteris, donec in Aegyptum post remiseris.

- Claud.* Sic fiet. *Troph.* Succollate igitur hanc capsulam.
Poll. Fiet. *Claud.* Malum ¹⁾! quam gravis est illa! *Troph.* Gaudetas.
 Duplo plus auri nam inde accipies postmodum.
Praef. Heus vos ²⁾, sistite gradum. *Troph.* O me nunc ter perditum!
Praef. Quid istuc est, quod bajulatis? *Troph.* Mummiam,
 Dux, quam mercator aegyptius exposuerat.
Praef. Id horae mummiam portatis ³⁾? Loculum humi
 Nunc deponite. *Claud. et Poll.* Ut i nos jubes ⁴⁾. *Praef.* Hem mummia est!
Troph. An me mendacem esse autumas?
 Dic ergo, quisnam tu es? *Troph.* Trophonius satis
 Hac urbe notus. *Praef.* Teneo. Tu autem? *Claud.* Claudius
 A Prochyte. *Praef.* Tu vero? *Poll.* Hujus conterraneus,
 Atque comes Pollio. *Praef.* Quid istic negotii
 Habes tu cum Trophonio? *Troph.* Mercator is...
Praef. Tace sis tu ⁵⁾, non te interrogo, sed Claudium.
 Dic ergo, Claudi. *Claud.* Forte fortuna adpulsi huc,
 Atque in Trophonium incidi, qui me suis
 Officiis sibi devinxit. *Praef.* Dic, quaeso, quibus
 Officiis? *Troph.* Quippe ⁶⁾ cum mercatum venerit...
Praef. Rursus respondes non rogatus? Vin' tibi,
 Linguam eradicem funditus, vaferrime?
 Sed ne amplius tuis fidas mendaciis,
 Neque tu tergiverseris, Claudi: nunc ego
 Res aperiam. Huic tu detulisti litteras
 In Aegypto datas a patre; fidissimus ⁷⁾
 Iste interpres de thesauro heic recondito
 Indicium fieri dixit, atque oraculo
 Loquentis Mercurii monstravit tibi locum,
 Ubi esset defossus, nempe ad Serapidis,
 Quem vi nummorum a te placandum esse docuit.
 Nonne id verum est? *Claud.* Inficiari ultra non queo.
Troph. Hen miserum! actum est de me! *Praef.* Dic ergo tu mihi,
 Quantum obtulisti nummorum Serapidi?

¹⁾ Sic alti gravi pressus pondere.

²⁾ Deprehenduntur a vigilibus.

³⁾ Facile argumentum Trophonii con-
 futat.

⁴⁾ Loculum humi deponunt.

⁵⁾ Trophonium interpellantem coërcet.

⁶⁾ Trophonius sermonem alio divertit.

⁷⁾ Ironice dictum.

- Claud.* Duo aureorum millia, demptis vix decem.
Praef. Papae! Thesaurum ergo eruisti protinus?
Claud. Hanc mummiā defodi. *Praef.* Est tibi, quod gratuler,
 Dives nunc factus es, sorte et gaude tua.
Claud. Heu amisi duo aureorum millia ¹⁾!
Praef. Ne plora: divinabit nam Trophonius,
 Quid factum est illis. Dic, vir sapientissime ²⁾,
 Divina dum, ubi sint illi bis mille aurei.
Troph. Ego vero nescio. *Praef.* Nunc verum praedicas:
 Nescis namque tulisse tuum ad me Serapidem:
 Atque adeo nunc tibi monstrabo. Adcedite huc ³⁾:
 Nummorum en sacculum, atque en Serapidem,
 De coelo de lapsu, qui belle sustulit.
 Agnoscis, Trophoni? Agnoscis, stultissime
 Claudi? *Claud.* Agnosco equidem. Proh Divum atque hominum fidem!
 Ubi sim nescio. Sic nobis illusi nequam!
Lucip. Ereptos Orci nummulos de faucibus!
Praef. Est ne tuus iste servus, Claudi ⁴⁾? *Claud.* Scilicet.
Praef. Quas partes agit is in hac comoedia?
Claud. Nullas. *Lucip.* Me semper suspectum tenet, improbis
 Praebet fidem? *Praef.* Hunc ergo vinculis exsolvit ⁵⁾,
 Divumque interpreti haec injicite arctissima.
Get. An me non solvis, vera qui narraverim?
Praef. Postmodo solvam: sed prius hanc fabulam volo
 Repraesentetis universis civibus.
 Hunc sacculum Trophonii suspendite
 Collo: vos iterum succollate hoc ferculum.
 Isto cum ornatu pompam tu claudes, Geta.
 Pompa sic instructa, pulcrum spectaculum
 Cras herele civibus praebebitis in foro,
 Praecone concinente, plaususque meritis
 Adeipietis. *Claud.* Num quid nos miseri meruimus,
 Quos sic ludificavit vir mendacissimus?

¹⁾ Lacrymans ait.⁴⁾ Ad Claudium.²⁾ Ad Trophonium, et irridens.³⁾ Vincula detrahantur servo, et inji-⁵⁾ Venit vigilum unus cum sacculo,
et Geta Serapidis ritu indatus.

ciuntur Trophonio.

- Praef.* Vestrae nam debetis poenas dementiae.
Poll. Parce, precamur, nobis tantum ludibrium.
Praef. Non ausculto. Hanc pompam, deducite milites.
Lucip. O pulcram certe pompam, et sollemnissimam!
Praef. Vos istis etiam, spectatores optimi,
Vel sibilos, vel plausus pro arbitrio date.

FINIS.